



Gabinete Wever - Croes II

ISLAONLINE


Noticia di Gobierno

2023

Diabierna 31 Maart 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



Evelyn Wever-Croes
PROME MINISTER

PREMIER WEVER-CROES TA INFORMA PARLAMENTO TOCANTE E "ONDERLINGE REGELING"

Prome Minister Evelyn Wever-Croes diahuebs atardi 30 di maart tabata den Parlamento pa duna informacion riba kico en realidad ta e onderlinge regeling. Esaki ta e acuerdo cu lo bin na luga di e ley di COHO cu otro siman definitivamente lo wordo bari di mesa. E onderlinge regeling ta bin na su luga y tur 4 pais ta bay di acuerdo cu esaki.

Prome Minister a indica cu no ta posibel pa duna Parlamento e textonan di e ley pasobra esaki ta un palabracion riba peticion di Hulanda y por wordo comparti ora cu keda cla cu e acuerdo. E no ta necesario tampoco mirando cu un "onderlinge regeling" ta un acuerdo entre gobierno y gobierno, e no ta un ley sino un acuerdo. Unabes cu esaki wordo conclui, lo por comparti cu demas stakeholder, den e caso aki Parlamento. Importante si ta, Prome Minister a enfatisa, pa mantene Parlamento informa di e cambionan cu tin den e acuerdo aki. "Nos tawata den Parlamento na final di januari, despues di e bishita na Sint Maarten na unda a yega na un acuerdo riba puntonan principal y awe nos a bolbe Parlamento pa duna un update y splicacion", Prome Minister a remarca.

Prome Minister a duna di conoce cu Parlamento a haya informacion awor den liñanan grandi y otro siman diamars ora e acuerdonan wordo firma, e ta wordo manda tambe pa e Parlamentarionan y si tin necesidad, lo por ta bek den Parlamento pa duna mas informacion.

"Importante ta cu nos ta cerando un capitulo di casi tres aña. Di momento cu na juni 2020, e pakete aki cu tabata yama CHE a bin riba mesa, pa despues e bira COHO y awor 'onderlinge regeling'. Nos ta casi cla, na unda por mira bek atras riba un periodo cu tabata dificil pero cu un areglo awor cu nos tur por haya nos mes den dje. Tur 4 pais ta di acuerdo cu n'e. E 'onderlinge regeling' aki ta respeta e autonomia di Parlamento. Acuerdonan entre gobierno ta mas flexibel y Parlamento no ta



wordo mara den esey. Esaki ta e mansahe cu nos a bin trece awe pa Parlamento", Prome Minister Evelyn Wever-Croes a duna di conoce.

Prome Minister ta gradici Parlamento pa e atencion cu nan tin pa semper tin oido y semper ta habri pa ricibi Gobierno pa duna informacion y pa scucha di Parlamento kico ta biba den nan cu ta importante y cu por yuda den e negociacionnan.

**Prome Minister Evelyn Wever-Croes:
Den conexion cu e peticion di Gobierno pa ricibi e documentonan
necesario pa dia 31 di maart:**

**"ARUBA NO A RICIBI E DOCUMENTONAN
NECESARIO FOR DI VENEZUELA, PA POR
CUMPLI CU APERTURA DI FRONTERA
MARITIMO DIA 1 DI MEI 2023"**



Diabierna mainta, Prome Minister a reuni cu e comision cu ta encarga cu e re-apertura di frontera cu Venezuela pa haya un idea riba e status di e peticion haci pa cu e documentonan necesario pa por habri e frontera maritimo, dia 1 di Mei 2023. Manera Gobierno a anuncia siman pasa, Aruba ta dispuesto pa habri frontera maritimo cu Venezuela riba dicho fecha si ricibi e documentonan y cumplimiento di e condicionnan prome cu 31 di Maart 2023.

Gobierno ta lamenta cu e documentonan no a wordo ricibi manera acorda, pero Aruba a wordo notifica si cu Venezuela ta trahando ainda riba nan. Unabes cu Aruba ricibi esakinan, lo verifica cu tur e condicionnan ta wordo cumpli. Den tanscurso di e dianan, Aruba lo ta preparando mas miho y mas intensivo pa si a caso haya e documentonan di Venezuela, lo por habri

e frontera maritimo cu Venezuela pa 1 di mei 2023.

Pa loke ta trata e frontera aereo, Aruba ta trahando riba un analisis di e riesgonan pa asina por yega na un solucion y/of bin cu un cambio di maneho of ley pa por acapara cada un di nan. Pa esaki Gobierno no por duna un fecha ainda.

"E fecha di apertura di e frontera maritimo, Gobierno a duna algun siman pasa. Sinceramente e ta lamentabel cu awe, dia 31 di maart, Aruba no a haya e documentonan necesario. Mi ta scoge pa keda optimista cu Gobierno lo ricibi e documentonan di Venezuela pronto, pa asina por informa comunidad di Aruba si lo continua cu e apertura di e frontera maritimo riba e fecha menciona", Prome Minister e expresa.

Prome Minister Evelyn Wever-Croes:

DISCURSO DI PROME MINISTER NA CELEBRACION DIA DI TRABAO SOCIAL

Diabierna 31 di maart mainta, a tuma luga na Renaissance Convention Center e Celebracion Dia di Trabao Social cu e tema Respetando diversidad mediante accion social conhunto. Prome Minister Evelyn Wever-Croes y Minister Rocco Tjon a asisti na e celebracion aki e mainta aki na unda cu Prome Minister a entrega un bunita discurso na unda cu el a gradici tur trahado social na Aruba pa nan incansabel trabou y a enfatisa e importancia di trabou social.

“Tin cu lo puntra nan mes kico ta asina special na trabao social cu mester dedica un dia pa su celebracion. E celebracion tin segun Federacion Internacional di Trahadonan Social como obhetivo pa destaca e logronan di e trahado social, aumenta e visibilidad di e servicionan social pa futuro di e sociedad y defende husticia social y e derechonan human. E fecha di e celebracion aki a bira un punto culminante riba e calender di e trabao social na unda tur trahado social na mundo ta celebra y promove e contribucion di e trabao na personanan individual, famianan, comunidanan y sociedad en general. Y p’esey mi ta contento di ta aki.

Trabao social ta un di e profesionnan cu ta crece mas rapido na nivel internacional cu cualkier otro profesion y ta haciendo esaki di forma significativo. Tin masha hopi motibo pakico trabao social ta un sector creciente. Un di e pruebanan solido ta cu e ta muestra resultadonan positivo ora gobiernonan en general ta inverti den servicionan social. Ora trahadonan social ta activo den un comunidad, sin importa si esaki ta grandi o chikito, semper e tin un impacto positivo cu ta resalta. E tin su efecto riba por ehempel reduccion di criminalidad, muchanan cu ta bay scol y tambe empleo.

Trabao social ta yuda e personan cu ta acudi pa ayudo resolve e probleman cu nan tin den nan bida cotidiano pa asina nan por funciona di forma social atrobe y participa di un forma mas digno den nos sociedad di acuerdo cu nan posibilidadnan.

Organisacionnan di trabao social ta colabora tambe estrechamente cu residentenan, Polis, educacion, asistencia, empresario y otro organizacionnan riba tereno social.

E pregunta cu ta surgi ta kico ta hiba un persona pa dedica parti di su tempo y su bida na trabao social? Nos sa cu tin biaha e ta un trabao malagradecido pa motibo no ta haya reconocimiento. Awe mi ta aki pa duna reconocimiento. Hopi hende ta kere cu un trahado social tin e “silver bullet” cu ta trece solucion pa e situacion cu e persona ta den. Loke hopi biaha no ta wordo comprendi ta pa un trahado social yuda bo, abo mes mester haci algun tipo di esfuerso pa yuda bo mes. E trahado social por tene bo man como guia pa trece bo riba e bon caminda pero ta bo mes mester dal e pasonan necesario.

E trahado social ta e persona cu hopi biaha tin e privilegio di ta testigo di e storia di un persona cu kizas antes nunca a



haya e oportunidad di cont’e. E trahado social por lo general ta hendenan cu un curason grandi, cu un sentido di y pa humanidad sobresaliente. Ora un hende scoge e trabao aki e ta pasobra nan ta kere y ta convenci cu nan alma y cuerpo cu nan por haci un diferencia den bida di esnan cu ta acerca nan pa ayudo. Manera Oprah Winfrey a bisa: “I’ve come to believe that each of us has a personal calling that’s as unique as a fingerprint – and that the best way to succeed is to discover what you love and then find a way to offer it to others in the form of service, working hard, and also allowing the energy of the universe to lead you.” E fingerprint di e trahado social sigur ta super unico.

E trabao social sinembargo ta encera un peligro pa e trahado social. Na unda nan ta pone e limite? Te con leu bo por laga bo trabao influencia bo bida priva? Ora bo sali di oficina atardi, e trabao ta keda na oficina of sin cu bo kier o realisa, bo ta hib’e cas? Tur esaki ta rekeri cu un trahado social, cu apesar di tin un curason cu por tuma hopi y por muestra hopi amor, pasion y compasion, ta un persona cu tin un caracter fuerte pa su propio bienestar y proteccion.

Un trahado social ta un persona cu tin e habilidad di percibi loke otro hende no ta wak.

Continuacion DISCURSO DI PROME MINISTER NA CELEBRACION....

Mary Kay Ash a yega di bisa: “Everyone has an invisible sign hanging from their neck saying, ‘Make me feel important.’ Never forget this message when working with people.” Abo si por lesa y decifra e sign aki mientras cu pa otro e ta keda desapercibi y nan no ni sa mes cu e t’ey.

Un trahado social tambe tin e don di haci loke Alexander Den Heijer a constata: “When a flower doesn’t bloom, you fix the environment in which it grows, not the flower.” E trahado social sa con pa trata e ambiente cu e flor ta crece aden pa haci esaki florea manera e ta destina pa haci.

Finalisando mi kier expresa palabranan di reconocimiento y gratitud na tur trahado social pa e labor fantastico cu a bin ta haci den bienestar di nos hendenan y consecuentemente nos comunidad. Nos tur sa cu si nos tin un comunidad sano y feliz cu un minimo na ups and downs, e suma total ta mas grandi cu cada un di su componente separa. E trahado social ta un actor cu ta contribui grandemente na esaki.

Keda haci e trabao bunita aki cu boso a scoge pa haci y briya cu resultado cu tur hende por mira pero muy en especial e personan cu boso ta touch nan alma cu boso labor.





LUNA CULTURAL TA CLAUSURA CU ENTREGA DI PREMIO NA GANADONAN DI DIFERENTE COMPETENCIA ESCOLAR CU TABATA TIN DURANTE CELEBRACION DI DIA DI HIMNO Y BANDERA

E siman aki Minister Maduro tabata tin e placer di por ricibi na Bestuurskantoor e ganadonan di e Competencia Escolar relaciona cu celebracion di Dia di Himno y Bandera 2023. E mandatario a felicita tur ganado y a gradicinan pa nan participacion. Igualmente a expresa danki na tur scol y maestronan, como tambe na mayornan, na un y tur pa motiva y yuda nos muchanan di scol den e competencianan aki.

KIBRA COCO DIGITAL

Comision Celebracion Dianan Nacional hunto cu SETAR a organisa un competencia di Kibra Coco Digital di cual tur mucha y famia por a participa y contesta pregunta. Esaki tabata un competencia pa scol preparatorio y basico, den cual e muchanan por a contesta varios pregunta tocante nos Himno y Bandera. E ganado a resulta Shakyen Maduro di Colegio San Hose cu a hunga cu su famia y a contesta mas pregunta corecto den menos tempo.

VIDEO - KICO MAS BO TA GUSTA DI ARUBA

Tur klas di scol por a graba un video y load esaki riba un QR Code cu a wordo crea special pa e competencia. Muchanan den klas cu ayudo di nan docente mester a graba un video cu ta mostra nan creatividad di expresa kico mas nan ta gusta di Aruba. Klas 5b di juffrouw Melisa Croes di St. Anna School a gana e competencia. Tur e muchanan di klas lo ricibi un dushi treat di Domino's Pizza.

COMPETENCIA DI PINTURA

Durante e luna cultural a reparti pa mas di 12 mil mucha di scol preparatorio y basico, un pintura di cual e muchanan mester a pinta uzando nan creatividad pa expresa kico mas nan ta gusta di Aruba.



Comision di Maestro a percura pa evalua e pinturanan ricibi y na final a scoge e 4 pintura cu mas a resalta den categoria di Scol Preparatorio y pa Scolnan Basico onderbouw, middenbouw y bovenbouw. E ganadonan ta, Emma Palacio Betancurt di Scol Preparatorio Cayena
Sylee Wongfat di Pastor Kranwinkel klas 1a, Juanita Bedoya di Maria Goretti School klas 4 y
Bryson Geerman di Scol Basico Xander Bogaerts klas 5b.

GRADICIMENTO

Na final Minister di Finansa y Cultura ta gradici tur mucha y scolnan cu a participa den e competencianan brinda durante nos luna cultural. Un danki special na tur e partners cu a yuda haci e actividadnan cultural den luna di maart exitoso. Danki na Ministerio di Cultura, Departamento di Cultura, Comision Celebracion Dianan Nacional, SETAR, UNOCA, Utilities Group, WEB, Elmar, APA, AAA y ATA pa e aporte na cultura di Aruba.

Continuacion LUNA CULTURAL TA CLAUSURA CU ENTREGA DI PREMIO....





ARUBA HAPPY ONE PASS TA BIRA UN REALIDAD

Biaha cu credencialnan digital ta facilita y mehora e calidad di e experiencia pa e pasahero for di e momento cu nan book, por medio di comparti data biometrico di un pasahero



Minister di Turismo & Salud publico, Sr. Dangui Oduber, ta anuncia e implementacion exitoso di e proyecto piloto Aruba Happy One Pass (HOP), un aplicacion mobil conforme e standard di One ID. E aplicacion pa pasaheronan a wordo crea por medio di cooperacion entre Aruba Tourism Authority (ATA), Inmigracion Aruba, SITA y Indicio. E aplicacion aki lo ofrece pasaheronan e opcion pa yena y cumpli cu tur rekisito di inmigracion prome cu nan aborda nan avion haciendo uzo di credencialnan digital. Na momento cu nan caba cu e proceso aki, nan lo ricibi un confirmacion di 'ready-to-fly' status prome cu nan subi nan avion rumbo pa Aruba.

E meta di Aruba HOP ta pa streamline y hasi e proceso di control na airport mas eficiente, reduciendo e oportunidad di comete error, fraude of robo di identidad. Esaki lo resulta den menos tempo di espera na airport pa e pasaheronan y crea un experiencia mas placentero pa nan por yega nan destino mas liher.

Locual ta hasi e proyecto di Aruba HOP unico ta cu e lo cumpli cu tur ley di privacidad, ofreciendo pasaheronan cu hasi uzo di esaki control completo di nan data, y dunando nan e opcion pa escohe nan preferencia di cual data nan kier comparti. Pues, no lo tin niun tercer partido cu ta ricibi e informacion confidencial aki, e pasahero mes lo maneha esaki. E Aruba HOP lo warda e data ricibi responsablemente, conforme e rekisitonan di privacidad di data.

Segun CEO di Aruba Tourism Authority, Ronella Croes, Aruba Happy One Pass su proposito ta pa transforma e experiencia di nos pasaheronan, creando un proceso di seguridad mas eficiente caminda cu cada pasahero tin tur locual nan mester riba nan mobil personal. "Aruba ta sumamente orguyoso di ta na e frontline di innovacion den e industria di turismo, brindando un experiencia excepcional pa nos bishitantenan, cuminsando na airport te cu nos playanan unico". Sra. Croes ta elabora, indicando cu "Aruba, One Happy Island, ta un di e destinonan den Caribe cu ta wordo bishita multiple biaha door di turistanan. Aruba ta ofrece lamanan inigualabel, un experiencia culinario diverso, hotelnan y villanan unico, y tambe nos Parke Nacional Arikok, cu tin un biodiversidad inolvidabel – un isla cu ta lider den innovacion. Pais Aruba a logra un top spot den e revista popular 'Lonely Planet's Best in Travel 2020' door di tur e esfuerzo pa crea un isla mas sostenibel. Den e mundo cu ta evolucionando rapidamente, e protocolnan di 'Health & Happiness Code' di Aruba ta duna bishitantenan un paz mental y e oportunidad pa disfruta di un vakantie sigur y relahante riba nos isla. Aruba su posicion, pafo di e belt di horcan, tin hopi pa ofrece turistanan variando for di getaways romantico te cu experiencianan di salud y bienestar. Mas informacion por wordo haña riba www.aruba.com".

Continuacion ARUBA HAPPY ONE PASS TA BIRA UN REALIDAD....



Jeremy Springall, Vice-Presidente di SITA, SITAAT BORDERS, ta menciona cu “Aruba Happy One Pass ta huzando identidad digital den biahe, pa segura e seguridad y un proceso mas confortabel y lihe pa e pasahero”. Segun Mr. Springall “Aruba HOP ta conserva e privacidad di e pasahero na mesun momento cu e ta dunanan un pre-cleared “ready-to-go” status, sin mester musta e pasport fisico. Esaki ta un innovacion tremendo no solamente pa crusa fontera aereo, pero tambe maritimo y terrestre.

E proyecto aki a pasa door di un periodo largo di pruebanan extensivo prome cu e la bira un realidad, cuminsando for di 2021 caminda cu SITA y Indicio a uza tecnologia di credencialnan digital pa maneha e Aruba Health App, facilitando e data pa pruebanan di COVID y e proceso di vacuna. Aruba HOP ta duna pasaheronan e oportunidad pa transforma nan pasport den un identidad y credencial digital, di cual e autenticidad y integridad por wordo verifica automaticamente cu e permiso di e pasahero.



CEO di Indicio, sra. Heather Dahl, ta splica cu data biometrico y credencialnan digital ta tecnologia clave pa por sigura un experiencia confortabel pa pasaheronan. “SITA y Aruba su compromiso cu e conservacion di privacidad ta ofrece pasaheronan e oportunidad pa warda informacion/data den nan mobil y comparti esaki ora nan ta desea, pa un experiencia mas placentero”.

Minister Oduber semper a kere den e innovacion y a opta pa haci esaki central den e strategia di su maneho y su vision. Su meta ta pa sigui crea socionan pa asina sigui desaroya e proyecto aki den henter e industria di hospitalidad pa asina mas y mas stakeholders por beneficia di e innovacion aki pa asina por ofrece e mihor calidad di servicio na nan huesped. E obhetivo principal di e “Seamless Travel Experience” ta pa fomenta un proceso di biahe ful digitalisa y mas eficiente pa biaha for di y pa Aruba.



MINISTERIO DI DEPORTE TA SOSTENE TRANSMISION DI PELEANAN POPULAR DI BOXEO



Diaranson mainta, Minister Endy Croes a reuni cu Sr. Cornel Djaoen y Sr. Ludwig Leito unda a trata dos topico interesante pa e mundo di boxeo. E prome topico cu a trata ta e congreso internacional di Global Boxing Federation (GBF), cu tin e intencion ta pa haci un congreso grandi na Aruba otro aña. Sr. Djaoen y Sr. Leito a presenta e plan di GBF na e Mandatario di Deporte, tin alrededor di 50 pais di entre otro Africa y America, Asia y Europa cu ta desea di participa na e congreso aki.

E congreso ta culmina cu algun pelea internacional hopi popular. E proyecto ta den fase pa finalisa cu e “business plan”. Mandatario di Deporte a expresa cu e ta bunita proyecto y iniciativa. Banda di esaki, a trata un otro topico esta e racha di boxeo, unda cu ta transmiti peleanan internacional a traves

di television. Dia 22 di april proximo na Las Vegas, Nevada ta tuma luga e pelea di Tank Davis vs Ryan Garcia. Tin un gran interes pa e pelea y premira di ta uno sumamente interesante cu lo paralisa mundo.

Minister Endy Croes a sigui bisa cu e la compronde cu den 2 ora cu a habri e benta di ticket, e pelea a sold out, pues esaki ta musta e interes pa e pelea aki. Tin diferente pelea planea pa tuma luga den luna di mei y augustus, unda cu a dialoga riba esakinan y a duna sosten pa cu e transmision di peleanan popular unda cu pueblo por disfruta di e deporte di aki. Pues, dos topico di interes cu a wordo hopi bon atendi y ta en espera di mas documento pa asina por finalisa e otro proyectonan.

Minister Endy Croes:

TA LOGRA FIRMA UN MOU EXITOSO CU VALENCIA COLLEGE NA ORLANDO, FLORIDA



Recientemente, Minister di Enseñansa y Deporte Sr. Endy Croes hunto cu Minister Plenipotenciario Sra. Joselin Croes staciona na Washington, Consul General Ruth Emmerink y Vice Consul General di Reino Hulandes Sr. Luuk Nijman ambos staciona na Miami a realiza un biahe di trabou na Orlando, Florida. Durante e biahe aki, a bishita Valencia College y a logra firma un tremendo Memorandum of Understanding (MoU) cu ta beneficia nos studiantenan di Aruba.

Valencia College ta hopi popular, mirando cu e tarifa di college ta mas economico den comparacion cu otro college publico na Central Florida. Valencia College ta completamente acredita pa Southern Association of Colleges and Schools y na aña 2011 el a keda nombra door di Aspen Institute como e miho college comunitario di e pais. Den comparacion cu universidad publico di Florida, e nivel di enseñansa di Valencia College ta igual, pero e tarifa di college ta 40 por ciento menos, e klasnan ta mas chikito y tin mas recurso di apoyo. Valencia College ta conta cu un total di 140 estudio, certificado y training acelera disponibel. Fuera di esaki, Valencia College tin un compromiso cu University of Central Florida (UCF), cual ta encera cu e studiantenan cu gradua di Valencia college por drenta inmediatamente UCF. Universidadnan na Florida ta ofrece un diversidad amplio di estudio y ta un estado hopi cerca di Aruba, cu buelo di entre dos pa tres ora. Esaki ta haci cu nos yiunan di tera por bay studia hopi mas cerca di cas.

A logra firma un MoU cu Valencia College, unda cu e studiantenan di Aruba lo haya un descuento adicional pa nan estudio. Estudio na Merca ta hopi costoso, pero si nos logra acuerdonan unda cu nos studiantenan por paga “in-state tuition” of por aplica pa e LAC Scholarship ta haci accesibel pa nan eherce un estudio ayanan. Actualmente, tin un cantidad di 20 estudiante Arubiano cu ta studiando na Valencia



College. A logra papia cu 5 estudiante di Aruba y tur a expresa hopi positivo di e college y di e docentenan. E studiantenan a expresa cu e docentenan di Valencia College ta hopi atento y e sistema di enseñansa cu nan tin ta yuda e studiantenan yega na unda nan mester yega. Tambe, nan a recomenda na e studiantenan di Aruba cu ta desea di continua nan estudio na Valencia College pa busca informacion di e scol pa sa kico e ta encera. E acuerdo cu a logra haci cu Valencia College ta reduccion ariba “collegegeld” di 1000 dollar pa aña. Desde augustus 2023, e studiantenan di Aruba por bin na remarke pa e esaki, pero ainda no ta concretisa cuanto estudiante por bin na remarke.

Sra. Talia Papovski, Senior Director di International Student Services di Valencia College a indica cu a firma un MoU cu Minister di Enseñansa y Deporte di Aruba pa promove enseñansa na Merca y encurasha e studiantenan di Aruba pa studia na Valencia College na Orlando, Florida. Tambe, Sra. Papovski a expresa cu actualmente nan tin diferente estudiante di Aruba aya y ta spera di por ricibi mas estudiante di Aruba den futuro. Sra. Papovski a denota cu nan ta hopi emocionada pa promove Valencia College y crea mas colaboracion internacional cu Ministerio di Enseñansa.

Pa finalisa, Minister Endy Croes ta indica cu ta contento di por brinda nos studiantenan oportunidad di haya un otro sistema di enseñansa den comparacion cu enseñansa di Hulanda. Por mira atras riba un tremendo biahe di trabou cu resultadonan y logro positivo banda di algun simiña cu a wordo planta, cual durante e aña aki lo duna mas resultado positivo. Danki sigur na e gran labor di Minister Plenipotenciario Joselin Croes y Consulnan di Hulanda Ruth Emmerink y Luuk Nijman. Hunto nos ta logra. Pabien Aruba.




Den cuadro di e "Aruba Hydrogen Valley": **MINISTER CROES A BISHITA E CADENA HOTELERO IBEROSTAR, PA EXPERENCIA E TRANSFORMACION DI E CADENA HOTELERO AKI, PA ENERGIA LIMPI**

Durante su bishita na Spaña, Minister Glenbert Croes y su delegacion a reuni cu ehecutivonan di e cadena hotelero, Iberostar. Manera ta conoci, Iberostar ta un di e motornan turistico di e isla spaño Mallorca. Hunto nan a transforma y desaroya e isla den un 'Green Hydrogen Island'. Mirando e vision di gobierno di Aruba pa transforma Aruba tambe den un "Green Hydrogen Island", Minister Glenbert Croes a bishita e cadena aki, pa riba su mes experiencia, con e infraestructura di e isla aki a desaroya, cu a bira e prome isla cu ta funciona a base di energia limpi, cu ta hidrogeno.

E delegacion di Aruba a wordo ricibi pa Sra Gloria Fluxà, cu ta e vice-presidente y directora di sostenibilidad di e cadena hotelero aki. Durante nan bishita, e delegacion a ricibi un presentacion, riba e proceso di transformacion di nan hotelnan y riba e futuro di Iberostar na Aruba.

Sra Gloria Fluxà a expresa di ta hopi contento cu e bishita di Minister Croes na Iberostar, y su interes pa scucha di e proceso di transformacion pa energia limpi. Iberostar ta un compania familiar cu ta compromete pa ofrece servicionan di calidad y sostenibel. Sostenibilidad ta integra caba den e plannan strategico y ta wordo ehecuta den tur hotel di e cadena aki. Segun sra Fluxà, ta importante pa e modelo turistico aki, ta un inspiracion pa e futuro generacion pa sigui cuida e medio ambiente. Tambe, ta di aprecia di mira con Aruba como isla turistico ta enfocando riba e tema di sostenibilidad ofreciendo asina un experiencia unico y diferente na su bishitantenan.

"Di prome momento cu nos a bishita Aruba, nos a enamora di e isla. Nos tabata convenci y iluciona di por bin cu un proyecto riba Aruba, y awe nos ta contento cu esaki awor ta un realidad. E ta nos compromiso pa traha man den man cu e comunidad di Aruba, teniendo na cuenta e necesidad di e isla. Como invitado, nos lo purba na adapta lo mihor posibel pa asina por duna balor y aporta na e sector turistico." Sra Fluxà a expresa.



MENSAHE DI GOBIERNO DI ARUBA
PA TEMPORADA DI CAMPAMENTO



Bar Cuide!

DRENTANDO TEMPORADA DI CAMPAMENTO, BAN
GOSA DI NOS PLAYANAN PERO TENE CUENTA CU
KICO BO POR HACI Y KICO BO NO POR HACI. NO LAGA
E PLAYANAN SUSHI Y NO DESTRUI NOS PLAYANAN.

PRIME MINISTER
Evelyn Wever-Croes

Bar Cuide!

HUNTO NOS A LOGRA CU EAGLE BEACH
TA NUMBER 1 PLAYA DEN CARIBE
Y HUNTO NOS TIN CU CUIDE!

Un mensahe di Gobierno di Aruba pa e temporada di
CAMPAMENTO



Positivismo ta un factor importante pa logra union. Ora cu famianan y comunidadnan ta traha hunto pa metanan comun, e chens pa exito ta bira mas grandi. Tambe e ta crea un ambiente mas stabiel y harmonioso cu ta necesario pa e crecimiento y desaroyo di un sociedad.